

## **LUHAMBA LWA KWANJA LWA PETERU ULONGOLERU**

Luhamba lwa kwanja lwa Peteru lulembitiwi na ntumintumi Peteru. Peteru kanjiti luhamba lwakuwi kwa kulonga mweni kagaa na gaa yakamlembiliriti. Mweni kawalembiliriti wantu woseri yawamjimira Yesu yawawera wahenga mupasipanu (1Pet1:1). Yomberi katenditi hangu kwa wabetula wakuwi mala zivuwa kulanguziya mweni ndo yakalulembiti toziya luhamba alu lulifana na luhamba lwa Paulu kwa Waefesu, wantu wavya wa jimiria kuwera luhamba alu lwa kwanja lwa Peteru lulembitiwi pa lulii lwa Waefesu pakwegera na mushinja sha malongu sita na muhanu Pakwiyuka Yesu. Peteru kalulembiti luhamba alu pakawera Rumi pakapashemiti Babuloni (5:13).

Peteru kalongiti kuwera kalembiti luhamba alu kwa nfiru ya “kukupanana moyu gwenga na kuwapitawulira kuwera aga ndo manemu ga nakaka ga Mlungu” (5:12). Kwana malinganiru mavuwa pakati pa luhamba lwa kwanja lwa Peteru 2:11-3:7 na Waefesu 5:18-6:9 na Wakolosayi 3:18-4:6. Vipandi vyoseri vitatu vyankuyowelera kuusu ulongu wa kaya na kuujimira ulonguziya. Yomberi viraakankuwapanana moyu wantu yawamjimira Yesu kuhepelera pawawera muntabiku toziya upeleru wapakwegera, shipandi sha 4:1

**Yagaweramu**

Peteru kankulimaniziya kuwagambiziya wabetula wakuwi, shipandi sha 1:1-2

Shakapanu kankulonga mayagashii kwa Mlungu kwa ulopoziya woseri wantu yawajimira Yesu waupata na ntambu yauwera na mana mumakaliru gawu, shipandi sha 1:3-2:10

Kayi kankuwagambiziya wantu yawamjimira Yesu ntambu yakulikala weri pasipanu na kutakulira uganja wapakwegera wa mpalu na mdala gwakuwi na mmanda na mtuwa gwakuwi, shipandi sha 2:11-4:11

Shakapanu Peteru kankuwapanana moyu kuhepelera pawawera muntabiku, shipandi sha 4:12-5:11

Kankulumalilira luhamba lwakuwi, shipandi sha 5:12-14

### *Malamusiwu*

<sup>1</sup> Neni Peteru, ntumintumi gwa Yesu Kristu, nankuwalembra mwenga wantu yawasyagulitwi na Mlungu Tati, wantu yampalanganyikiti na kulikala gambira watugira isi aku Pontu na Galatiya na Kapadokiya na Asiya na Bituniya.

<sup>2</sup> Mlungu Tati kawasyaguliti mwenga kulawirana na ntambu yakafira mweni, na mpungwa kwa Rohu, mpati kumjimira Yesu Kristu na kumishirwa kwa mwazi gwakuwi.

Manemu na ponga gavuwa gaweri pamuhera na mwenga.

### *Litumbiru lyanakaka*

<sup>3</sup> Tumkwisi Mlungu na Tati gwa Mtuwa gwetu Yesu Kristu! Kwa lusungu lwakuwi likulu katupanana twenga ukomu wa syayi kwa kumzyukisiya Yesu Kristu. Katupanana litumbiru lyankaka,

<sup>4</sup> su twankulolera uhala wa matekeleru ga Mlungu, matekeleru yagawola ndiri na yagahera uhakata na galii yaganyala ndiri. Mlungu kawatulira kumpindi matekeleru aga.

<sup>5</sup> Na mwenga mlolewa weri na makakala ga Mlungu kwa njira ya njimiru toziya ya ulopoziya yauwera kala kugubutulwa mumashaka ga upeleru.

<sup>6</sup> Munemeleri mushitwatira ashi, paiwera vinu kwa shipindi shididini hamfiruwi kuhinginiki toziya ya majeru ga ntambu yingiyangi yamtabika.

<sup>7</sup> Majeru aga lengu lyakuwi ndo kulanguziya nakaka njimiru yenu, yaiwera na mana nentu kului zahabu yeni tembera ata payiwora ijerisiwa kwa motu. Toziya ayi mwenga hampati uzyumi na ligoya na ukwisa, lishaka lilii Yesu Kristu pakagubutulwa.

<sup>8</sup> Mwenga mwankumfira yomberi tembera mumwoniti ndiri, na mumjimira tembera mumwona ndiri vinu. Su munemelera kwa ukwisa yawutakulika ndiri,

<sup>9</sup> toziya mwankuwanka ulopoziya wa rohu zyenu, wawuwera lengu lya njimiru yenu.

<sup>10</sup> Wambuyi wa Mlungu yawatungiti kuusu manemu geni hagaweri ga nakaka kwa mwenga, wasakuliti na kukosiya kosiya kuusu ulopoziya awu,

<sup>11</sup> womberi wafiriti kushimana shipindi na ntambu yashiwera, shipindi pakatakuliti Rohu gwa Kristu yakaweriti mngati mwawu, pakatunga kuusu ntabika hayimpati Kristu na ukwisa yauuwiza.

<sup>12</sup> Mlungu kawagubuturiti wambuyi wakuwi kuwera ujumbi ulii yawaubweriti, walibweleriti ndiri weni kumbiti wawabweleriti mwenga Shisoweru Shiwigira kwa makakala ga Rohu Mnanagala yakatumitwi kulawa kumpindi kwa Mlungu, lihengu ali liwera ndiri na mota yawu weni kumbiti kwajili ya mwenga. Ata wantumintumi wa kumpindi mewafiri kuvimana vitwatira avi.

*Waumini wafiruwa walikali makaliru mananagala*

<sup>13</sup> Su muweri kala nakamu na kulikala masu. Mlituli litumbiru lyenu lyoseri mumanemu galii hampananwi shipindi Yesu Kristu pakagubutulwa.

<sup>14</sup> Gambira wana wa Mlungu yawajimira, namujimira nakamu kufata kayi matamata zidoda zyamuweriti nazu pamuwumaniti ndiri unakaka wa Mlungu.

<sup>15</sup> Kumbiti yomberi yakawashemiti ndo mnanganala, su mwenga muweri wananganala muvyoseri vyamutenda.

<sup>16</sup> Toziya Malembu Mananganala galembwa, “Muweri wananganala toziya nenii ndo mnanganala.”

<sup>17</sup> Pamumkanda Mlungu, mwenga mumshema Tati. Su muvimani kuwera yomberi kamtoza

kila yumu kulawirana na matendu gakuwi pota kubagula, mwendereyi kumjimira Mluntu pamulikala gambira wahenga pasipanu.

<sup>18</sup> Toziya muvimana kuwera mwenga mlopozitwi mumgenderanu gwenu yagufaa ndiri yagumwankiti kulawa kwa wazewi wenu. Kumbiti mlopoziwiti ndiri kwa vintu vyaviharabika, kwa mpiya ama zahabu,

<sup>19</sup> kumbiti kwa mwazi gwa mana nentu gwa Kristu, yakaweriti gambira mwana kondolu yaka-hera shilema ama lidowa.

<sup>20</sup> Yomberi kasyagulitwi na Mluntu pamberi pa kunyawa pasipanu, kumbiti kagubutulitwi mumashaka aga ga upeleru toziya ya mwenga.

<sup>21</sup> Kwa njira yakuwi mwenga mwankumjimira Mluntu yakamzyukisiyiti na kumpanana ukwisa, su njimiru yenu na litumbiru lyenu viwera kwa Mluntu.

<sup>22</sup> Vinu mwenga mulipunga maweni kwa kujimira unakaka, su mwenga muwfira nakaka wayenu pota na ufyangu, su mulifiri nakamu kwa moyu gwoseri.

<sup>23</sup> Toziya mpananitwi ukomu wa syayi, ulii yawulawiti ndiri mumbeyu yayiharabika, kumbiti kulawa mumbeyu yayiharabika ndiri kwa njira ya ujumbi wa Mluntu yauuwera ukomu na wa mashaka goseri.

<sup>24</sup> Malembu Mananagala ntambu yagalonga,  
“Kila muntu kalifana na mahamba,  
na ukwisa wakuwi woseri ulifana na uluwa wa mahamba.

Mahamba ganyala, na uluwa utuluka.

<sup>25</sup> Kumbiti ujumbi wa Mtuwa ulikala mashaka goseri.”  
Ujumbi awu ndo Shisoweru Shiwigira shamub-weleritwi.

## 2

### *Libuwi lyaliwera likomu*

<sup>1</sup> Su muleki ukondola woseri na upayira na ufyangu na weya na kila ntambu zya kutakulirana madoda.

<sup>2</sup> Gambira wana wanonu ntambu yawafira maweri, mfiruwa kuwera na mata ga maweri geni ga shirohu, su kwa aga mpati kukula muulopoziya wenu.

<sup>3</sup> Vinu mwenga muvimana kuwera Mtuwa ndo muheri.

<sup>4</sup> Su mumgenderi Mtuwa, libuwi lya ukomu lyalilemitwi na wantu, kumbiti kulongolu kwa Mlungu ndo libuwi lyalisyagulitwi na lya mana nentu.

<sup>5</sup> Na mwenga vulaa, gambira mabuwi yagawera makomu, munyawiwia muweri numba ya shirohu kweni aku hamtenderi ntambu mtambika gwa shirohu pakalaviya tambiku zya shirohu zyazijimirwa na Mlungu kuitira Yesu Kristu.

<sup>6</sup> Toziya Mumalembu Mananagala galembitwi,  
“Guloli, nankutula libuwi aku Sayuni,  
libuwi lya lyanjiru lya mupembi lyalisyagulitwi  
na lya mana nentu,

na muntu yoseri yakamjimira yomberi hapeni  
kasoniziwi.”

<sup>7</sup> Kwa mwenga yamuujimira, libuwi ali lyana mana nentu. Kumbiti kwa walii yawajimira ndiri, Malembu Mananagala ntambu yagalonga,

“Libuwi lyawalilemiti wanyawa numba, liwera libuwi lyaliwera na mana kuliku goseri,”

<sup>8</sup> kayi galonga,

“Libuwi ali ndo wantu hawalikwali, litalawu haliwatendi womberi waguwu.”

Womberi walikwala toziya wajimira ndiri ujumbi wa Mlungu, na hangu ndo ntambu yawapangiwitwi kwanjira kwanja.

<sup>9</sup> Kumbiti mwenga ndo lukolu lwalusyagulwa na utambika wa shifalumi na shipinga sha wantu wanangala na wantu wakuwi Mlungu, yamushemitwi kubwera matendu makulu gakulikangasha ga Mlungu, yakawashemitwi kulawa muluwindu na kuwayingiziya muulangala wakuwi wa kulikangasha.

<sup>10</sup> Shipindi shimu, mwenga muwera ndiri wantu wa Mlungu, kumbiti vinu mwenga muwera wantu wakuwi, shipindi shimu muwoneritwi ndiri lusungu na Mlungu, kumbiti vinu muwonerwa lusungu.

### *Mulikali gambira wamanda wa Mlungu*

<sup>11</sup> Waganja wangu, nuwahiga nentu mwenga gambira wahenga na yawapita pasipanu! Muleki matamata zidoda zyazisingana na rohu zyenu.

<sup>12</sup> Mfiruwa kuwera na mgenderanu guherepa nentu pakati pa wantu yawamumana ndiri Mlungu su ata pawawatakulira mtenda madoda wawezi kugamana matendu genu maheri, su wamkwisi Mlungu lishaka lya kwiza kuwatoza wantu.

<sup>13</sup> Su muwajimiri walongoziya woseri wa wantu toziya ya Mtuwa, ujimira kwa mfalumi yakaweriti mkolamlima mkulu,

**14** ama ujimira kwa walongoziya wa mikowa, weni yawasyagulitwi nayomberi kuwatoza yawa-tenda madoda na kuwazyuma yawatenda ga-herepa.

**15** Toziya Mlungu kankufira mwenga kwa ma-tendu genu maheri gamtenda, muwanyamaliziyi wantu wazigizigi yawahera mahala.

**16** Mulikali gambira wantu walekeru, kumbiti namuwutendera ulekeru wenu kuwufifa ukon-dola, kumbiti mulikali gambira wantumintumi wa Mlungu.

**17** Muwapanani ligoya wantu woseri. Muwafiri walongu wenu waumini na mmupanani ligoya Mlungu. Mmupanani ligoya mfalumi.

### *Mfanu gwa ntabiku ya Kristu*

**18** Mwenga wantumintumi wa ukaya, muwa-jimiri watuwa wenu kwa ligoya lyoseri, yawa-wera waheri na yawawera wapoli, muwajimiri ata walii yawakalaziya.

**19** Toziya handa muhepelera kutama kwa ntabiku yamfiruwa ndiri toziya muvimana handa Mlungu kafira hangu, su Mlungu hakawatuli weri.

**20** Hamupati shishi pamuhepelera makomangu gamfiruwa toziya ya vidoda vyamtenda? Kumbiti handa pamuhepelera ntabiku ata paiweri mtenda maheri, Mlungu hakafiriziwi na mwenga.

**21** Aga ndo gamshemiritwi, Kristu mweni katabikiti toziya ya mwenga, na kawalekerani mfanu, su mtendi ntambu yakatenditi mweni.

**22** Yomberi katenditi ndiri vidoda, ama katakuliti ndiri upayira woseri.

**23** Pawamwigiliti yomberi kawankula ndiri kwa kwigila, pakapatiti ntabiku yomberi kalaviyiti ndiri vitiriziwi, su kagatuliti matumbiru gakuwi kwa Mlungu, mtoza gwa teratera.

**24** Yomberi mweni kavipapiti vidoda vyetu munshimba mwakuwi pakapingikitwi palupingika, su tuleki kutenda vidoda na kulikala makaliru gagamfirizya Mlungu, na kwa vironda vyakuwi mwenga mponiziwitwi.

**25** Mwenga muweriti gambira wakondolu yawaweriti wagamira, kumbiti vinu mumuwuyira Mlolera na yakawulolera ukomu wenu.

### 3

#### *Wapalu na wadala*

**1** Namwenga wadala, mlituli pasi pa uwezu wa wapalu wenu, su handa kwana wapalu woseri yawajimira ndiri shisoweru sha Mlungu, wapati kujimira kwa kuguwona mgenderanu gwenu. Hayiweri ndiri kwa mwenga mpaka kutakula shisoweru,

**2** toziya hawawoni ntambu mgenderanu gwenu yaguwera guherepa na gwa ligoya.

**3** Kuliheripiziya kwa mwenga namtumbira vitwatira vya kunja, gambira ntambu zya kudukusa viri zya maringisu nentu na kuvala vintu vya zahabu na nguwu zya beyi nkulu.

**4** Su uhorepa wenu ufiruwa kulawirana na ntambu ya mngati mwa untu wa nakaka, uhorepa yawunyala ndiri wa uheri na unyamaliru wa rohu, weni ndo wa mana nentu palongolu pa Mlungu.

**5** Hangu ndo ntambu yawaliherepiziyiti pamakashu wadala wanagala yawamguwiriti na kumtumbira Mlungu kwa kulitula pasi pa wapalu wawu,

**6** gambira Sara ntambu yakalituliti pasi pa Aburahamu na kumshema yomberi mtuwa gwakuwi. Mwenga muwera vinu wahinga wakuwi handa pamutenda gaherepa pota kutiliziwa shintu shoseri.

**7** Ntambu iraa ayi mwenga wapalu, mulikali na wadala wenu kwa mahala, muwapanani ligoya pamuvimana kuwera womberi wawera legilegi na ntambu yawawera wahala pamuhera na mwenga manemu ga ukomu, mtendi hangu su kwahera shintu hashileweleri maluwa genu kwa Mlungu.

### *Kutabika toziya ya kutenda Maher*

**8** Upeleru, mwenga mwawoseri mfiruwa kuwera na moyu gumu na pamuliwonera lusungu maweni mwenga na muweri wapoli na wananga.

**9** Namuwawuzilira wantu vidoda kwa vidoda, ama mayigilangu kwa mayigilangu kumbiti muwatekeleri, toziya mwenga mshemitwi na Mlungu mpatti kugahala matekeleri.

**10** Malembu Mananagala galonga,  
“Muntu yakafiriti kuganemelera makaliru,  
na kugawona mashaka gaherepa,  
kalileweleri nakatakula makondola  
na kushapira kulonga upayira.

**11** Kaleki kutenda ukondola na katendi gaherepa,  
kayisakuli ponga na kuyikolera weri.

**12** Toziya masu ga Mtuwa gawalola walii yawawera waheri na kugapikanira maluwa gawu, Kumbiti kawatulira shisogu wantu yawatenda makondola.”

**13** Ndo gaa hakawatenduwi mwenga handa pamuwera wagangamala mukutenda gaherepa?

**14** Kumbiti ata pamfiruwa kupata ntabiku toziya ya kutenda yagamfiriziya Mlungu, su mtekelerwa! Namtira shilii shawatira womberi, namutulwa mukushashatika.

**15** Kumbiti mumkwisi Kristu kuwera Mtuwa mumyoyu mwenu. Muweri kala kumwankula muntu yoseri yakawakosiya litumbiru lyamuweera nali.

**16** Su mtendi hangu kwa lyoga na ligoya, kumbiti muweri na nfiru zyazitulanguziya mwahera likosa, su woseri pawawahigilanga kulawirana na mgenderanu guherepa yamuwera nagu mu Kristu, womberi hawasoniziwi kwa shilii shawawayowelera.

**17** Toziya iherepa kutabika kwa kutenda matheri, Mlungu pakafira, kuliku kutabika kwa kutenda makondola.

**18** Su Kristu viraa katabisiytwi na kuhowa kwa mala yimu hera toziya ya vidoda, yomberi yakaweriti muheri katabisiytwi na kuhowa toziya ya wantu wakondola, su kawalanguziyi mwenga njira ya kumgendera Mlungu. Yomberi kalagitwi shinshimba kumbiti katenditwi mkomu murohu,

**19** na kwa rohu vulaa yomberi kagenditi kuzibwelera rohu zilii zyaziweriti mushibetubetu

**20** yawalemiti kujimila pamakashu Mlungu pakawahepeleriti mumashaka ga Nuhu shipindi Safina payiweriti yankunyawiwa. Musafina amu, wantu watangala ndiri, wantu wanani hera pa wantu woseri ndo walopoziwitwi pamashi,

**21** na mashi geni gaweriti mfanu gwa ubatizu yauwalopoziyiti mwenga vinu vulaa. Ubatizu ndo shisoweru ndiri shakuwusiya udoda munshimba kumbiti ndo lagilu lya nfiru iherepa kwa Mlungu. Liwalopoziyi mwenga kwa uzyukusiwu wa Yesu Kristu,

**22** yomberi yakagenditi kumpindi na vinu kalikala uwega wa kumliwu wa Mlungu, kankuwakolamlima wantumintumi wa kumpindi wa Mlungu woseri na ukulu na yawawera na makakala.

## 4

### *Makaliru ga syayi*

**1** Toziya Kristu katabisiwitwi munshimba yakuwi, na mwenga vulaa mfiruwa kuligangamaziya kwa nfiru gambira yakuwi mana muntu yakatabisiwitwi kala munshimba su kaleka kutenda vidoda.

**2** Kwanjira vinu, makaliru yagasignaliti kulikala pasipanu gafiruwa ndiri kulonguziwa na matamata zya umuntu kumbiti gafiruwa kulonguziwa na mafilaru ga Mlungu.

**3** Pamakashu mwenga muweriti na shipindi shivuwa sha kutenda vitwatira vyavitendwa na wantu yawamumana ndiri Mlungu. Mulikaliti makaliru ga umweni na matamata na ndewu na kulowera nentu na kuguwira vinyagu.

<sup>4</sup> Vinu wantu yawamumana ndiri Mlungu wankulikangasha pawawona kuwera hamuweri ndiri pamuhera nawomberi kayi kulikala muvidoda, su wankuwahigilanga.

<sup>5</sup> Kumbiti womberi hawafiruwi kutakula vitwatira vyoseri vya makaliru gawu kulongolu kwa Mlungu yakawera kala kuwatoza yawawera wakomu na wahowiti.

<sup>6</sup> Ndo mana Shisoweru Shiwigira shibweritwi ata kwa walii vinu wahowiti, su womberi watozwi mumakaliru gawu ga mnshimba gambira wamonga, kumbiti walikali murohu ntambu Mlungu yakalikala.

*Ntumintumi muheri gwa mafupu ga Mlungu.*

<sup>7</sup> Upeleru wa vintu vyoseri wapakwegera. Su mfiruwa muweri na maholu gaherepa na kulikolamlima maweni na kulikala masu muwezi kumluwa Mlungu.

<sup>8</sup> Pa goseri aga, mulifiri kwa moyu gwoseri maweni mwenga, toziya mafiliru gagubika vidoda vivuwa.

<sup>9</sup> Mulishemeru maweni gweka munumba zyenu pota kuhinginika.

<sup>10</sup> Kila yumu kafiruwa kulitendera lifupu lyakapananitwi na Mlungu kuwatendera wamonga, gambira ntumintumi muheri gwa mafupu ga ntambu yingiyingi ga Mlungu.

<sup>11</sup> Yakalonga shintu, visoweru vyakuwi viweri gambira visoweru vya Mlungu, na kila yakawatanga wantu katendi hangu kwa likakala lyakapananitwi na Mlungu, su muvitwatira vyoseri Mlungu kakwiswi kuitira Yesu Kristu.

Kwakuwi kuweri ukwisa na likakala mashaka goseri. Yina haa.

*Kutabika handa Mkristu*

<sup>12</sup> Waganja wangu, namulikangasha kwa majeru makulu gampata, handa mpatwa na vitwatira vihenga.

<sup>13</sup> Su munemeleri toziya mtabiki handa Kristu ntambu yakatabikiti, su muwezi kuwera na nemeleru ivuwa shipindi ukwisa wakuwi paugubutulwa.

<sup>14</sup> Mpeterwa mwenga payiwera mwankuyigirangwa toziya ya kumfata Kristu, shitwatira ashi shimanizira handa Rohu gwa ukwisa, mana yakuwi Rohu gwa Mlungu, kalikala pamuhera namwenga.

<sup>15</sup> Nakawera muntu yoseri mngati mwenu, handa pakatabika, toziya ndo mlaga na mwivi na yakatenda makondola.

<sup>16</sup> Kumbiti handa muntu pakatabika toziya ndo kamjimira Yesu, kafiruwa nakawona soni, su kamkwisi Mlungu, toziya muntu ayu kashemwa kwa litawu lya Kristu.

<sup>17</sup> Shipindi sha kutoza shisoka, na kutoza aku kwankwanja na wantu wakuwi Mlungu mweni. Payiwera kutoza aku kuyanjira k watwenga, su upeleru wakuwi hauweri wa ntambu gaa kwa walii yawalema kushijimira Shisoweru Shiwigira sha Mlungu?

<sup>18</sup> Malembu Mananagala galonga,  
“Payiwera vikamala kwa wantu yawamfiriziya  
Mlungu kulopoziwa,  
su hayiweri hashi kwa wantu yawamguwira ndiri  
Mlungu na yawatenda vidoda?”

**19** Su walii yawatabika kulawirana na mafil-  
iru ga Mlungu, mwendereyi kutenda yagaherepa  
na walituli pasi pa Muwumba gwawu yakawera  
mwaminika.

## 5

### *Kushilolera shipinga sha wantu sha Mlungu*

**1** Kwa wazewi yawawera yawalongoziya pakati  
penu, neni nu wahiga panwera mzewi muyenu,  
mkapitawu gwa ntabika ya Kristu na ntenditi pa-  
muhera muukwisa haugubutulwi pamberi,

**2** mushiloleri weri shipinga shampanganitwi  
na Mlungu, mushiloleri weri, kwa kulazimisha  
ndiri kumbiti kwa moyu muheri ntambu yakafira  
Mlungu. Mtendi lihengu ali kwa kufira ndiri  
mpiya, kumbiti kwa moyu gwenu gwoseri.

**3** Namuwakolamlima kwa makakala walii  
yawatulitwi pasi pa ugolokera wenu, kumbiti  
muweri mfanu kwa shipinga ashi.

**4** Na Mlolera Mkulu pakalawira, mwenga  
hamuwanki lijengeri lya ukwisa yawufifiya ndiri.

**5** Ntambu iraa ayi mwenga wantemba mu-  
firuwa kuwajimira wazewi yawalongoziya. Mwa-  
woseri mwenga mfiruwa kuwera wananga su  
mpati kulitenderana maweni toziya Malembu  
Mananagala galonga, “Mlungu kawasinga wantu  
yawawera na malingisi kumbiti kawalanguziya  
manemu wantu yawawera wananga.”

**6** Su mnanagi pasi pa liwoku lya Mlungu lyali-  
wera na makakala, su kawanyasuli kwa shipindi  
shakuwi.

**7** Mumtulili magaziwu genu goseri, toziya  
yomberi kankuwalolera weri.

**8** Mulikolimlima na mulikali masu! Toziya mngondu gwenu, Mkondola, kankuzyengetazyengeta gambira simba yakaguguma pakasakula muntu gwa kumliya nakamu.

**9** Mgangamali munjimiru na mumlemi Shetani, pamuvimana kuwera walongu wenu yawajimira Kristu poseri pasipanu wankupananwa na ntabiku iraa ayi.

**10** Kumbiti pamtabika kala kwa shipindi shididini, Mlungu yakawera gwa manemu goseri yakawashemiti kwingira muukwisa wakuwi wa mashaka goseri mukulikolerana pamuhera na Kristu, yomberi mweni hakawatendi waweri wakomu kayi na kuwatula makakala na kuwagangamaziya na kuwapanana lyanjiru ligangamala.

**11** Kwakuwi Mlungu kuweri uwezu mashaka goseri! Yina haa.

### *Malamusiwu ga upeleru*

**12** Nuwalembiriti luhamba alu ludidini kwa utanga wa Silwanu, mlongu yanummana na kumjimira. Nfira kuwapanana moyu na kutakula kuwera shitwatira ashi ndo manemu ga nakaka ga Mlungu. Mgangamali mumanemu aga.

**13** Shipinga sha wantu yawamjimira Kristu wayenu yawasyagulitwi na Mlungu panu Babiloni, wankuwalamsiya. Vulaa vilii Mariku yakawera gambira mwana gwangu, kankuwalamsiya.

**14** Mulilamsiyi kwa lirangaliru lya mafilaru ga wantu yawalikolerana pamuhera na Kristu.

Ponga iweri kwa mwenga mwawoseri yamu-likolerana pamuhera na Kristu. Yina haa.

## **Lipatanu Lya Syayi Kwa Wantu Woseri The New Testament in Pogoro**

copyright © 2014 Pioneer Bible Translators

Language: Pogolo

Contributor: Pioneer Bible Translators

### **The New Testament in Shipogoro**

This translation, published by Pioneer Bible Translators and The Word for the World, was published in 2014.

If you are interested in obtaining a printed copy, please contact The Word for the World at [www.twftw.org](http://www.twftw.org).

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2019-12-30

---

PDF generated using Haiola and XeLaTeX on 18 Apr 2025 from source files dated 29 Jan 2022

be0eb903-ba79-5fbd-8667-f25c3cab4358